

GABINETE AVP-OLA II OFICIALMENTE INSTALA

ORANJESTAD (AAN): Ayera merdia 4'or e gobierno nobo di Aruba a keda oficialmente instala pa Gobernador mr. Olindo Koolman. Cu instalacion di e gabinete AVP-OLA II Aruba a haya su gobierno nobo desde eleccion di dia 12 di December 1997. Gabinete AVP-OLA II ta conta siete minister di cual dos hende muher, reflehando un desaroyo positivo pa cu e posicion di hende muher den nos comunidad.

E gabinete ta conta cu dos minister nobo y hopi experiencia politico y gubernamental den personanan manera Watty Vos cu ta regresa riba e puesto di minister di husticia y obranan publico y minister Henny Eman riba e puesto di Minister di Asuntunan General. Minister Watty Vos a huramenta pa di cuater biaha como minister di husticia den su carera. Y minister Henny Eman pa di tres biaha como Minister Presidente di nos pais. Den personanan manera minister Tico Croes y Junior Croes, ta wak e ingredientenan di innovacion y capacidad di e generacion nobo di politiconan Arubiano. E ministernan femenino dr. Lili Beke-Martinez y Mary Wever-Lacle ta completa y complementa e gabinete cu nan interes y preocupacion politico pa sectornan social y huben-tud.

E carteranan di ministernan a keda reparti di e siguiente forma:

Mr. J.H.A. (Henny) Eman ta Minister di Asuntunan General, Minister Presidente.

Edgar 'Watty' Vos ta Minister di Husticia y Obranan Publico.

Robertico R. 'Tico' Croes MA ta Minister di Finanzas.

Dr. Israel 'Ike' Posner ta Minister di Salubridad Publico.

M.S.F. Mary Wever-Lacle ta Minister di Enseñansa y Labor.

Dr. Lili Beke-Martinez ta Minister asuntunan Economico, Turismo, asuntunan Social y Cultura.

G.F. 'Juni' Croes ta Minister di Transporte, Comunicacion y Deporte.

E combinacion di experiencia, profesionalismo y un programa di gobernacion cu hopi punto innovativo di gabinete Eman III, ta worde considera un combinacion di factornan sumamente importante pa e gobierno cu tin cu guia Aruba pa drenta e siglo y milenio nobo. Den e añanan nos dilanti por spera hopi cambio grandi riba hopi terene tur rond di mundo, cu lo tin nan influencia riba nos comunidad tambe. Pa e motibo aki tambe e programa di gobernacion a worde traha asina amplio y asina profundo alavez. Hunto cu e 'team' di gobierno nobo e ta un garantia pa estabilidad, progreso y prosperidad na Aruba awor y den futuro. Den un mundo cu ta cambia y sigui cambia, Aruba lo keda reconocibel pa su caracter unico, su simples y cordialidad, su seguridad y calidad di bida halto.

Cu e programa di gobernacion aki gabinete AVP-OLA II lo pone atencion riba tur e terenan importante pa para desaroyonan indesea y stimula un desaroyo necesario y rekeri pa nos comunidad chikito. Manten-cion di e caracteristiconan idiosincraticas di nos pais combina cu innovacion y cambianan riba terenonan relevante di economia, enseñansa, medio ambiente, husticia, salubridad y di gobernacion mes ta pa sigura un desaroyo balansa y humano pa tur nos hendenan.

Gabinete AVP-OLA II ta un continuacion riba e base di desaroyo pa stabilisacion economico y social y di restauracion di e bon number y di orden gubernamental cu a cuminsa bao di Gabinete AVP-OLA I. Especialmente pa loke ta trata e desaroyo social, fortificacion di nos economia y comienso di innovacion di areanan manera di enseñansa, husticia y economia. Alavez e ta un comienso nobo riba otro terenonan cu awe ta cla pa haya e atencion of cu no a haya suficiente den pasado. E comienso cu e introduccion di e plan di pension general pa tur

trahador, e implementacion di e "Plan di Bario" ta forman cu e manejo innovativo y coordina riba diferente tereno lo worde reconoci. Alavez projectionan grandi manera e renobacion integral di aeropuerto, e renobacion di e zona liber,

introduccion di e seguro medico general y e saneamento di finanzas publico cu a cuminsa bao di gabinete AVP-OLA II, lo worde completa. Dunando Aruba di e forma aki condicionnan mas fuerte pa su futuro desaroyo economico, gubernamental y so-

cial.

Cu un entusiasmo nobo y fuerte Gabinete AVP-OLA II ta cuminsa awe cu e tarea di guia Aruba pa e futuro cu Aruba mes a scohe pe: uno di estabilidad, seguridad y prosperidad pa un y tur.

Traspaso di Ministerio di Transporte y comunicacion



Cambio di number di aeropuerto

ORANJESTAD (AAN) For di departamento di ministro di Transporte y Comunicacion, redaccion di DIARIO a haya un comunicado den cual ta worde anuncia cu den un reunion cu a tuma lugar riba 17 di juni 1998 di accionistanan di Aruba Airport Authority, a keda dicidi cu e number di aeropuerto di Aruba lo cambia despues di trabaoan di expansion.

Den e reunion di AAA riba

17 di juni 1998 e decision a worde tuma pa cambia e number di Aeropuerto di Aruba cual number actualmente ta Aeropuerto Internacional Reina Beatrix, pa e number nobo: Aeropuerto Internacional Libertador Betico Croes.

E cambio di number mester tuma lugar despues cu trabaoan di expansion keda cla y e fecha exacto lo worde anuncia.

ORANJESTAD (AAN) Ayera atardi na un forma simbolico ministro Glenbert Croes a traspasa su ministerio

pa su ruman homber Junior Croes kende a bira e ministro nobo di Transporte y Comunicacion den e gabinete nobo

cu a keda huramenta ayera.

Glenbert Croes lo bay den parlamento como miembro di fraccion di OLA.